



La posta da l'entir Grischun vegn e va la saira ad Untervaz – en la nova centrala da distribuziun postal. Di per di èn quai tranter auter era var 60 000 pachets.

FOTO LA POSTA

Nus essan Untervaz

Pertge portan (quasi) tut las brevs en il Grischun il bul da posta «7200 Untervaz»?

DAVID TRUTTMANN/FMR

■ **Dapi october vegn garnida quasi tut la posta en il Grischun cun il bul da posta dad Untervaz. La raschun: Dapi october exista là ina centrala da distribuziun regiunala. Che ils buls da posta da las singulas vischnancas svaneschan uschia plaun e plat na para da disturbar nagin.** Pli baud pudev'ins far da detectiv: Sch'ins survegniva ina brev e n'enconuscheva betg la scrittira dal speditur u da la speditura, lura devi in simpel tric: guardar sin il bul da posta. Ed a maun da quel eri forsa pussaivel d'eruir da tgi che la brev era, senza ch'ins aveva dad avrir quella. Quai n'è betg pli pussaivel.

Per illustrar quai ha la FMR ha fatg in test. Redacturas e redactors da Scuol, Mustér u Vuorz han tramess en la centrala a Cuira ina simpla cartulina postal. Francà tut correct, cun A u B. Arrivadas a Cuira èn las cartulinas quests davos dis cun in sulet bul, sco sch'ellas fissan vegnidas speditas tuttas davent da la medema vischnanca: «7200 Untervaz». Pertge quai?

Da maschinass enstagl a maun

Thomas Schifferle, il pledader da la secziun da la Svizra orientala da l'interpresa la «Posta» conferma sin dumonda: «Gea, dapi ils 16 d'october 2020, dapi che la centrala da distribuziun regiunala ad Untervaz è en funcziun, vegnan tuttas brevs e tut ils pachets dal chantun Grischun – cun excepziun da las brevs da la Regiun Moesa – elavuradas e bulladas ad Untervaz.» Brevs e pachets da l'autra vart dal San Bernardino (Calanca e Mesauca) vegnan elavurads e bullads en il center da distribuziun regiunala a Cadenazzo (TI).

La raschun per «centralisar» la distribuziun ad Untervaz, e cun quai era ils buls postals, è tenor la Posta evidenta: garantir vinavant la qualitat (spertezza, punctualitad, fidadad) da la distribuziun postal. Sco Thomas Schifferle declera, vai per optimar ils process da lavur, per deliberar ils collavurats en las singulas filialas da blera lavur, surtut vers saira. Ed i va era per evitar sbagls.

Tac-tac, tac-tac, tac-tac

Avant bullavan las singulas filialas las brevs ed ils pachets – e surtut faschevan ils posttenents e las posttenentas quai a maun: 7180 Mustér, 7550 Scuol u 7460 Savognin. Mintga posta cun ses bul. Tgi



ha anc en l'ureglia la ramur – il tac-tac, tac-tac, tac-tac – cura che quints e brevs vegnivan bullads davos il fanestrigl sin posta? «Ussa vegn quai fatg per gronda part da las maschinass ad Untervaz, e quai surtut la saira», declera Thomas Schifferle.

Dad Ardez a Scuol via Untervaz

Per illustrar ils process pon ins prender sco exempel ina brev dad Ardez a Scuol: Quella vegn bittada en ina chascha ad Ardez e spedita la saira senza bul ora Untervaz. Là vegn ella bullada e distribuïda cun l'autra posta puspè enavos tras il Ve-

90 000 pachets al di

(fmr/dat) En Svizra ha la Posta trais centers gronds da distribuziun e quatter centers regiunals, in da quels è dapi l'atun passà ad Untervaz. Quel è vegnì inaugurà il november 2020, trais emnas suenter ch'el è ì en funcziun. Ils custs da quel: 60 milliuns francs. 155 collavuraturas e collavuraturats. Ad Untervaz vegnan repartids di per di var 60'000 pachets, durant l'intensiv Advent da corona dal 2020 è quella cifra perfin creschida sin 90'000 pachets al di. Davent dad Untervaz vegn distribuïda la posta dal Grischun (cun excepziun da Mesauca e Calanca), ma era quella da la regiun da Sargans e da la Val dal Rain.

«Per la filatelia n'han quels buls nagina valor materiala.»

Martin Schneider, filatelist

reina per arrivar il proxim di a Scuol tar il destinatur. I para a prima vista detg curius ch'ina brev dad Ardez a Scuol sto far il gir sur Untervaz. Però Thomas Schifferle relativescha: «Gia avant l'inauguraziun dal center regiunala ad Untervaz bandunava quella brev l'Engiadina per lura turnar. Ella gieva perfin en fin giu Frauenfeld, en il grond center da distribuziun. L'unica differenza è che la brev survegn ussa er anc il bul dal nov center regiunala.»

Tge far però, sche ina clienta u in client vulesch explicit il bul da l'atgna vischnanca? Thomas Schifferle: «Sche insatgi vulesch sin sia brev anc il bul local, quel u quella po laschar bullar sia posta direct al spurtegl da la filiala. Autramain vegn si il bul dad Untervaz.»

Tge capita ussa cun ils buls tradiziunals?

E tge vul quai dir per ils buls tradiziunals da posta cun si num, cifra postal e forsa perfin anc ina bella siluetta da la vischnanca? Han ils buls locals insumma anc ina funcziun u svaneschan els? Els vegnan duvrads – tenor las infurmaziuns dal pledader da la Posta – be anc per «spediziuns filatelisticas» ubain per quittar cedels da pajament. Uschia ch'els na svaneschan anc betg dal tutfat.

Però deplorescha insumma insatgi che tut vegn «unifitgà» cun Untervaz? La risposta para d'esser clera: na. Gnanc il filatelist professiunal Martin Schneider, il qual ha ina fatschenta a Cuira e che abitescha sez ad Untervaz, n'ha mal il cor pervi dals buls da posta che svaneschan plaunsieu: «Per la filatelia n'han quels buls nagina valor materiala. Cler, per colleziunaders da marcas da hobi, e per regola era pli vegls, pon quels buls forsa satisfar in tschert interess. Ma per ils filatelists che documenteschan l'istorgia da la posta, n'han ils buls nagin'impurtanza.» Martin Schneider sa dumonda era en general, quant ditg ch'i dettia insumma anc marcas postalas.

Era Thomas Schifferle, il pledader da la Posta, n'ha gi gnanc ina suletta reacziun da clients sin ils novs proceders tar ils buls da posta. Enfin che la dumonda da la FMR è arrivada! Uschia ch'i vegn a restar cler per il proxim avegnir: Nus essan Untervaz.

Illustraziun/copia dad in bul original da la Posta: Silvana Derungs